

Visoki predstavnik/specijalni predstavnik EU posjetio Moskvu



Visoki predstavnik/specijalni predstavnik EU, Miroslav Lajčak, danas je posjetio Moskvu gdje se susreo sa zamjenikom ministra vanjskih poslova Ruske Federacije, Vladimirom Genadijevičem Titovim. U centru razgovora je bila trenutna politička situacija u BiH, napredak koji ostvaruje BiH u pogledu stabilnosti i ekonomskog razvoja kao i predstojeći sastanak Vijeća za implementaciju mira.

Visoki predstavnik je zamjenika ministra Titova obavijestio o ključnim reformskim pitanjima, naročito o reformi policije. Zamjenik ministra je izrazio podršku ruske vlade reformskim nastojanjima visokog predstavnika/specijalnog predstavnika EU.

Visoki predstavnik/specijalni predstavnik EU i zamjenik ministra Titov su se složili da reforme koje su vezane za integraciju u EU predstavljaju najbolju strategiju za razvoj zemlje.

«Prioritet međunarodne zajednice je da BiH učini stabilnom, prosperitetnom i modernom evropskom državom» izjavio je visoki predstavnik i specijalni predstavnik EU Miroslav Lajčak.

Ruska Federacija je ključna članica Upravnog odbora Vijeća za implementaciju mira. Visoki predstavnik/specijalni predstavnik EU Lajčak istaknuo je pozitivnu ulogu koju je Rusija odigrala u razvoju BiH, te da je podrška Rusije od suštinskog značaja

ukoliko se želi da program reformi u BiH uspije.

Posjeta visokog predstavnika/specijalnog predstavnika EU Moskvi je prva u nizu posjeta glavnim gradovima ključnih članica Vijeća za implementaciju mira u cilju informiranja ovih zemalja o napretku koji ostvaruje BiH prije sastanka Vijeća za implementaciju mira, koji će se 30. i 31. oktobra održati u Sarajevu.